



子昂集卷之四

明都御史王 廷校刻

門人黃姬水劉鳳同校

表

、為李卿讓本官表

臣某言伏奉月日恩勅依舊授臣中大夫守司農卿臣  
枯骨再生更蒙寵命魂魄競越不知所圖云臣寔庸  
愚本無名節庇身公族竊軒冕之餘假翼宗枝濫衣冠  
之末因循寵服累歷榮班素食之責每深効拙之勤未  
補橫被逆賊徐敬真以私讐嫁禍誣臣云與叔孝逸交  
通逆豎獄官執法真以極刑臣嘗領之誅已甘灰粉泉



壤之魄分隔幽冥不圖天地之恩再生枯骨日月之照  
曲被幽泉祭臣非辜慙臣無罪不牽文法之議特垂赦  
宥之慈蠅蟻微軀復得全活自非陛下克明克聖至德  
至仁臣之魂骸不保今日臣免死為幸豈敢期榮陛下  
重加寵章還臣舊職典司宗伯以睦周親愚臣胡顏敢  
冒朝典况臣叔孝逸推使未廻在於愚臣更須待罪安  
敢私職以玷國章伏乞天恩照臣愚懇不勝感戴生榮  
之至云

為陳舍人讓官表

臣某言伏奉今日詔書以臣為鳳閣舍人榮命自天  
寵章非次祇奉惶越顛沛失圖中謝臣以諸生空不期

達徒以時逢昭泰迹忝周行非有君子瑚璉之材通儒  
青紫之秀已得詳刑北寺執憲南臺鸞鳩之政無聞駟  
馬之榮已極陛下天飛踐祚雲紀命官陽館初開庶政  
惟始金章玉式允待其人如臣疲駑宜所遐棄豈圖尚  
矜庸劣昭覩欽明任同信臣寵優時輩預參詳於詔獄  
叨獎渥於宸階省已循躬實知非分陛下不以榮過其  
量職越其才遂欲超絕親賢參掌樞要司言鳳綵揮翰  
龍池愚臣何人敢冒天造臣聞紫機務重青瑣任隆位  
匪其人政由有關臣才無經濟識昧典章將何以光贊  
帝猷奉揚休命物無異議政允其中臣雖小人必知不  
可况乎君子豈曰能賢伏望妙選時英旁求衆議僉



曰惟允以弼良圖愚臣懇誠非敢飾讓

為司刑袁卿讓官表

臣某言伏奉某月日勅授臣某官祇拜寵光魂首飛越  
中謝臣聞王者敬慎懋在典刑天下允平取茲廷尉苟  
非其任法不虛行臣本庸微名術無紀皆緣際會昭遇  
盛明謬得揚歷簪微陪奉鴛鴦綢繆榮祿在苒平時毫  
髮之功無聞於官守素飡之責每積於公朝何嘗不悚  
迫惟憂夙夜祇畏而天恩方被寵命仍加復蒙璽誥之  
榮驟覩銀章之貴永言非據稽首知慙伏惟神皇陛下  
恭已受圖任賢興化方其合符皇極代理天工臣亦何  
人敢妨賢路伏見某官弱冠登仕早有能名每以清白

洗心不為寒溫變節誠使榮加天官職察雲司必能利  
用文明哀矜度獄彌成五教無謝於虞臣典載三墳允  
諧於周議愚臣暗昧不識大猷請乞以所授官讓與某  
官庶使官允其才名不失實聖明有得人之盛愚臣無  
冒責之譏實在聖慈鑒非虛謬

為張著作謝父官表

臣某言臣父某守官不謹獲罪自躬犯非清廉法宜不  
赦實由臣為子不孝使父陷刑天恩不肅嚴科放全首  
領臣得父子相見已是非圖豈謂天澤無涯更垂休命  
臣父子兄弟免罪從榮載惶載殞寔慶寔躍中謝臣父  
子凡品守道幽微天恩矜憫見垂采錄叨承恩幸廁列



陪臣自侍奉已來於今十有八載雖業藝無紀勞勩不聞小心恭勤實免愆過明明昊天實昭實察不敢有二不敢有私夙夜兢兢祇惕若厲所以父母兄弟皆荷恩私叨職謬官並預供奉摩頂至趾豈足上酬愚臣兢兢實慙實悚不意臣父衰老恃寵忘公貪潤微財取犯朝憲應是臣不忠不孝事父無良廉耻不修幾諫有闕遂使陷於刑法有玷國章臣之萬死無補此責刻肌刻骨泣血泣天恨負聖恩以媿朝列臣宜代父蒙罪自殞闕庭不合偷安尚求苟免誠以天波昭洗得更自新所以忍垢偷生剋躬自勵期効萬一補過酬恩灰軀糜骨以甘心願伏惟神皇陛下恩同父母矜照懇誠信其赤心

實有罄竭

云

為資州鄭使君讓官表

臣某言伏奉月日制以臣為資州刺史恭承璽命祇拜寵章匪服知慙循榮如失中謝臣學慙名術才乏器能而寶歷逢時金章坐忝題輿佐嶽無展驥之庸剖竹專城闕懸魚之化坐嘯徒積主諾空慙伏惟陛下革命開基造天立極方且弘宣帝典大啓皇猷而四岳觀風不虛其任六條班政允屬其才臣疲朽已侵循良允昧將何式光刺舉允協得人伏願博選英才克諧僉議使人光理政洽惟良大周之命惟新愚臣之責攸息其所讓入具如別狀



為武奉御謝表

臣某言伏奉某月日詔書以臣為尚食奉御肅恭休命  
祇拜寵章榮慶既崇慙荷交集臣才虧琢玉學昧蠶金  
徒以席寵葭莩容光日月叨承雲渥既廣天工而策更  
恩昇位非德舉無階而進坐致於青霄有慶方來載光  
於朱紱臣聞瑤庭任切攸稱六尚之榮玉食禮尊宴總  
八珍之貴臣術慙緣鶴業匪豢龍將何致美瓊芳式和  
金鼎鴻私曲被殊寵降臨天命既不可違聖恩允宜祇  
戴循涯揣分實所非圖

為王美暢謝兄官表

臣某言臣兄某前某官特蒙恩詔擢授豫州司馬未及

赴任即以某月日改亳州司馬再二策命叨荷恩私在

臣宗門實為慶幸

中謝

臣兄自解巾從仕三十餘年五

為縣宰三遷州佐政皆通顯職實恭勤直道在公有終  
始之節平心應物無造次之憊在於周行頗蒙推薦近  
屬虺貞構逆惑亂豫州詿誤平人自貽臯蒸陛下潤荆  
河之俗遭此無辜弔汝濱之人使其昭慶以為奉揚皇  
化者必籍其才撫馭窮人者亦資有德臣兄貞固濫承  
天獎遷授豫州在於天恩實為超擢今者未及赴任復  
降授亳州重疊承恩翻同貶降朝廷體例實亦為尤臣  
兄弟叨榮濫竊非據天慈改授不合冒聞但以始者承  
恩蒙越抽擢今有何過遂同左遷區區懇誠輒敢祈訴



天澤伏願皇慈有裕降昭獎之恩臣兄竭忠獲展才之地小臣死日猶生之年

、爲金吾將軍陳令英請免官表

臣某頓首死罪上言臣聞軍政不減春秋責帥故揚于之亂魏絳致職所以國有明賞下無濫功臣幸以常才文武兼闕始年十八投筆從戎西踰流沙東絕蒼海南征北伐無所不至帝寵門緒忝迹軒墀屬高宗崇德深仁孝理天下以臣祖父兄弟一門五人皆伏節盡忠身死王事遂超臣不次授原州都督臣時年三十二職兼五印榮絕一時階緣此恩累忝藩翰持節統部前後八州皆居塞垣當賊衝要國之重寄莫與臣比雖無長策

御戎伏胡恭守朝章保完免失屬陛下大聖矜老容愚不以臣駑怯更加寵命授以青紫遣督幽州林胡搆凶王師出討士馬雲集軍務星繁糧饋戈甲動以億計臣無田疇鄉導之策又乏杜預度支之才空竭疲單晝夜不息以勤補拙首尾三年彌縫闕漏幸無憊乏張玄遇等不謹師律賊得乘機遂敢長驅燕陲深入趙際臣又無李牧東胡之畧寔媿吳起西河之守使凶狡斂歎遂擾邊陲論之國憲合劾頸謝罪陛下又不以臣爲辜更授清邊軍副大總管五月恩制六月到軍逆虜天亡臣又無効至於軍功戰籍叙勲定勞副職日淺未及精覆大兵旋旆王師獻功而漢庭將軍未聞辭第雲中太守



已論增級今乃竊功謬賞有忝朝章忠誠殉節不昭國  
議實由臣濫其職任過其才上不能允副聖心中不能  
匡正戎律傍招物議有紊軍容臣罪何逃孰執其咎伏  
願乞賜骸骨貶歸私第式清朝序永覩師貞不勝惶懼  
○制曰卿出鎮窮塞作牧薊門雖無破陣之功終有捍  
城之效且膺巡警未可懸車

○為副大總管屯管大將軍謝表二首

臣聞玃狁不恭周王致其大戮將軍失律漢將被其嚴  
刑未有逆命驕天而連疊鼓之罰亡師沮衆遂寬戮社  
之誅伏惟天冊金輪皇帝陛下肅恭上帝子育群生萬  
國所以宅心百蠻由其屈膝而契丹凶狡敢竊邊陲毒

虐生靈暴殄天物皇兵順伐仗仁義以共行窮寇之  
憑險阻而猶闔臣等仁虧聖畧智昧詭圖遂以熊羆之  
師挫於犬羊之旅誠合結纓軍壘祇罪國章陛下以堯  
舜深仁且緩三苗之伐禹湯罪已不與萬方之辜遂得  
齒劍餘魂更參授鉞之任死綬之魄復同挾纊之恩四  
夷義以來蘇三軍感而抃舞痍瘡再起俘馘是圖將士  
同心誓雪孟明之耻殤魂共憤思亢杜回之讎臣等殉  
義忘心報恩惟死不任感激慶戴云云

謝衣表

臣今日日千騎田措至伏奉恩勅賜臣紫衫汗衫袴等  
一副臣萬死枯骨垂朽蒙榮載戰載殞肝心塗地中謝



臣以駑朽叨承重任憑奉聖畧誅討元凶實合震曜天威俘斬逆首而智力淺短進退無規被王孝傑陷鋒于前臣則接戰於後躬先士卒苦鬪山林自辰至酉殺賊無數崑谷峻狹車乘相闖旋被孝傑敗兵回相衝突逆賊乘便衆襲臣軍士卒被傷子將多死臣決命爭首陷陣摧克日暮兵疲瘡痍相半鳥散山谷人無鬪心臣獨無依遂失師律即欲刎頸陣下委骨顯誠寔恐身死寇塲未雪國恥所以含垢忍辱圖死闕庭今日六日至州即囚繫獄戶延頸戢魄唯待嚴刑湯鑊在前分委灰土豈謂天慈矜鑒回憲增榮以其伏鎖之魂更辱賜衣之寵煩寃踊躍載兢載惶泣血嘗膽誓復國讎刻骨刻肌敢忘天造不勝已死再生感戴欣躍之至

為建安王破賊表

臣某言今日得遼東都督高仇須等月日破逆賊契丹孫萬斬等一十一陣露布并捉得生口一百人送至軍前事三軍慶快不勝踴躍臣聞天之所棄雖暴必亡人之共讐在遠彌戮况凶羯遺醜未及犬羊固作孽以招誅自辜恩而取滅伏惟陛下威加四海子育百靈鬼神尚不敢違凶狡豈能逃罪逆賊萬斬等天奪其魄坐自為殃仇須等謹奉廟謀遠憑國計短兵纔接群逆銷亡返風迴烟薰睛掩日此乃天威潛運神道密周豈止人謀抑由靈助今盡滅殃病孽因折服飢災蕪至凋弊



日滋未加天兵應自糜爛臣訓勵士馬今月尅行大軍一臨凶寇必殄獻俘在即拜闕有期預喜承恩不勝慶賀

爲河內王等論軍功表

右金吾衛大將軍兼檢校洛州長史河內郡王臣懿宗加爵一等勳五轉司賓卿兼羽林大將軍建安郡王攸宜加爵一等勳七轉臣某等言伏奉月日制書錄臣等在軍微功特加前件勳封嘉命聿至寵渥載優伏對慙魂殞首顛越云臣聞古者名將先士卒而後身故其功勳末世庸將窮人力以寵已故其政乖然則簞醪投河三軍告醉刑印在手萬夫以離夫與衆共功專已獨

利成敗之理興亡繼焉賞者國之大事故不可忽日者林胡構孽敢亂燕陲陛下徵義兵誅不道天下士庶焱集星馳皆忘身憂國紆禍却難至於躬先矢石血塗草莽冒艱險歷寒溫氣騰青雲精貫白日誠亦勤矣雖則聖靈威武逆虜自滅然士卒戮力亦盡其勞今大功未酬衆議猶在而臣等驚怯猥先加封臣等不能折衝虜庭還師在席今坐加茅土之賜以先將士之勤使鷄冠虎臣將何以勸今戰士留滯於外府軍吏咨嗟於下寮臣等胡顏敢冒天造夫賞一勸百猶恐未孚利一阻萬其弊誰救爵命不可以招謗國章不可以假人伏願天光俯廻昭發軍禮請以臣等前件勳封廻受戰亡人及



立功將士等上以明國之大賞下以雪臣等謬功使人  
悅忘勞士感知死然後兵可訓勵賊可誅屠此誠國之  
元經不可苟而利者臣等不勝區區

為建安王謝借馬表

臣攸宜言伏奉聖慈勅借臣廐馬四疋星旗方列天馬  
忽來祇拜恩榮扑躍兼集臣名慙白馬陣昧青龍徒憑  
廟勝之威竊總元戎之首皇師夕露凶羯未孚方欲親  
負干戈身先士卒金山深入期突厥之功玉壺遂臨叨  
得駿之賜昔開東道今見西來感燕骨而長鳴君恩固  
報向朔雲而躡首蹋頓方擒坐馳千里寔愧三軍寵貴  
非圖榮多增懼

奏白鼠表

臣某言今日日臣等今中道前軍總管王孝傑進軍平  
州十九日行次漁陽界晝有白鼠入營孝傑捕得籠送  
者身如白雪目似黃金頓目跼伏帖若無氣將士同見  
皆謂賊降之徵臣聞鼠者坎精孽胡之象穿竊為盜凶  
賊之徒固合穴處野居宵行晝伏今白日歸命素質伏  
辜天亡之徵兆寔先露自孝傑發後再有賊中信來不  
謀同詞皆云盡滅病死親離衆潰匪朝即夕臣訓兵勵  
勇取亂侮亡昔宗剋鮮卑蒼鵝入幕今聖威遠振白鼠  
投營休兆同符實如靈契凡在將士孰不歡欣執馘獻  
俘期在不遠



為僧謝講表

僧某言一昨預內道場謂恩勅殊獎賜有褒稱死罪死罪其實專蒙昧于至道徒以早栖真寔委質香緣遂以濫越殊私光照寵渥日者法官間道講賜承恩叨玉塵之榮預金闈之議遂得對揚真會咫尺天威徒有明恩卒無幽贊不能絕王倪之問以默夸詞息毗耶之言冥通得意天休光被曲見稱揚群議允懷猥忘其陋顧揣涯分寔覩心顏將何翼亮緇徒發揮玄極以念嘉惠怵惕惟憂載懷愚瞽而心况知愧無任慚荷之至

謝藥表

臣某言伏奉中使宣勅旨賜貧道藥總若干味肅恭休

命敬受慚惶猥以眇身叨蒙大賴室殊方丈同問疾之榮施等醫王感能仁之惠雖赭鞞神授未可比其英莖赤芥仙圖固以謝其靈氣方將駐茲管魄彌彼衰痼以要上品之經將希大年之壽人微惠重答施何階不勝云

為喬補闕論突厥表

臣某言臣以顛蒙叨幸近侍陛下不以臣不肖特勅臣攝侍御史監護燕然西軍臣自違闕庭歷涉秋夏徒居邊徼無尺寸之功臣識暗劣孤負聖明然臣久在邊隅夙夜勤灼莫不以蕃事為念俾按察之比以突厥離亂事跡參驗委曲窮問往來竊有以得其真莫不自為鯨



鯢遍相吞食流離殘餓莫知所歸臣誠愚不識事機然竊以往古之變考驗於今乃知天下凶醜之時陛下收功之日然臣聞之難得易失者時也易遇難見者機也聖人所貴者去禍於未萌今陛下體上聖之資開太平之化匈奴爲中國之患自上代所苦久矣合天降其災以授陛下萬代之業在於今時臣請以秦漢以來事跡證明之伏願陛下少留聖聽尋繹省察天下幸甚臣聞始皇之時併吞六國制有天下按劍叱咤八荒奔馳然匈奴疆梁威不能服牧馬河內以侵邊疆始皇赫然使蒙恬將四十萬衆北築長城因以逐胡取其河南之地七百餘里當時燕齊海岱羸糧給費徭役煩苦人以不堪故長城未畢而閭左之戍已爲其患二世而亡莫不始於事胡也至漢興高祖受命率群雄乘利便以三十萬衆窘迫白登七日被圍僅而獲免自是歷呂太后至孝文帝單于桀驁益陵漢家文帝徒以遜詞致獻金帛但求其善和而已不敢有圖賈誼所以哭之痛文帝以天下盛而卑事戎狄以倒懸天下也景帝時邊受其患于是漢武踐祚以承六代鴻業屬乎文景玄默之化海內又安太倉之粟紅腐而不可食內庫之錢貫朽而不可校財力雄富士馬精疆忿匈奴之驕慢將報先帝之辱遂使王恢韓安國將三十萬衆以馬邑誘單于師出徒費竟無毫髮之功於是大命六師專以伐胡爲務首

徒費竟無毫髮之功於是大命六師專以伐胡爲務首



尾三十餘年中國騷然大受其弊至于國用不足軍興不給租及六畜筭及船車盜賊群興京師起亂竟不能制單于之命一日而臣服之漢宗衰殘幾至覆社稷也故漢武晚年戢兵革之弊乃下哀痛之詔罷輪臺之遊封丞相爲富民侯將以蘇中國也至宣帝代罕復出師屬匈奴數窮天降其禍虛閭權渠單于病死右賢王屠耆堂代立骨肉大臣自不相服又立虛閭權渠子爲呼韓邪單于擊殺屠耆堂諸名王貴人各自分立爲五單于更相攻擊以至大亂殘害死者計萬億數畜產耗減十至八九人以饑餓相燔燒以求食于是寄命無所諸名王貴人右伊秩訾且渠當戶以下將兵五萬稽首來

降於北方晏然靡有兵革之事直至哀平之際邊人以安臣竊以此觀匈奴之形察天時之變盛衰存亡之機事可見也然則匈奴不滅中國未可安卧亦明矣夫以漢祖之畧武帝之雄謀臣勇將勢盛雷電窮兵黷武傾天下以事之終不能屈一王服一國宣帝承哀竭之後撫瘡痍之人不敢惕然有出師之意然而未有遺矢之費而臣僕於單于之長者其故何哉蓋盛衰有時理亂有數故曰聖人修備以待時是以正天下如拾遺陛下肅恭神明德動天地今上帝降匈奴之災孽遺陛下之良時不以此時順天誅建大業使時過凶虜復興則萬代爲患雖後悔之亦不及矣古語曰天與不取反受其



咎今天意厚矣陛下豈可違之哉臣比在同城接居延海西逼近淮南口其磧北突厥來入者莫不一一臣所委察比者歸化首尾相仍携幼扶老已過數萬然而瘡痍羸憊皆無人色饑餓道死頗亦相繼先九姓中遭大旱經今三年矣野皆赤地少有生草以此羊馬死耗十至七八今所來者皆亦稍能勝致始得渡磧磧路既長又無好水草羊馬因此重以死盡莫不掘野鼠食草根或自相食以活喉命臣具委細問其磧北事皆異口同辭又耆老云自有九姓來未曾見此饑餓之甚今者同羅僕固都督早已伏誅為亂之元其自喪滅其餘外小醜徒侵暴自賊耳本無遠圖多獵菑復自相讎人被塗

炭迎順相半莫知所安回鶻諸部落又與金州橫相屠戮群生無主號訴嗷嗷臣所以願陛下建大策行遠圖大定北戎不勞陛下指揮之間事業可致則千載之後邊鄙無虞中國之人得安枕而卧豈不在陛下斷哉且匈奴為中國患非獨秦漢之間臣竊惟先聖時衛公李靖蓋中國之一老臣徒籍先帝之威用妙勝之策當頡利可汗全盛之日因機逐便大破虜庭遂繫其侯王裂其郡縣六十年將于今矣使中國晏然斥埃不警晝之唐史傳之無窮至今天下謂之為神况陛下統先帝之業履至尊之位醜虜狂悖大亂邊陲皇天遺陛下以鴻基之時陛下又得復先帝之跡德之大者其何以加若



失此機事以過往使李靖監子獨成千載之名臣愚竊  
爲陛下不取也伏見去月日勅令同城權置安北都護  
府以招納亡叛扼匈奴之喉臣伏慶陛下見幾于萬里  
之外得制匈奴之上策臣聞隗囂言漢光武見事于萬  
里之外制敵應變未嘗有遺今陛下超然神鑒遠照寔  
所謂聖明之見覩于無形也臣比住同城周觀其地利  
又博聞諳知山川者莫不悉備其地東西及北皆是大  
磧磧並石鹵水草不生突厥管所大入道莫過同城今  
居延海澤接張掖河中間堪管田處數百千頃水草畜  
牧供巨萬又甘州諸屯犬牙相接見所畜粟麥積數十  
萬田因水利種無不收運到同城甚省功費又居延河

海多有魚鹽此可謂強兵用武之國也陛下若調選天  
下精兵采拔名將任以同城都護臣愚料之不用三萬  
陛下大業不出數年可坐而取成臣七未看國家興兵  
但循於常軌主將不選士卒不練徒如驅市人以戰耳  
故臨陣對寇未嘗不先自潰散遂使夷狄乘利輕於國  
威兵愈出而力愈屈蓋是國家自過計於敵爾故非小  
醜能有異圖臣竊以爲陛下今日不更爲之無以激勵  
天下忠勇但欲以今日之兵今日之將異收功於異域  
建業於中興則臣之愚蒙必以爲未可得也陛下卽以  
突厥爲萬代之患則臣所言願加察若以夷狄荒服不  
臣小人非所敢諫臣今監領後軍某等取其月卽度磧



去計至某日及劉敬同謹當親按行稽計至比已來地  
形及突厥滅亡之勢當審虛實續以聞奏伏願陛下省  
臣此章爲國大計儻萬有一可中者請與三事大夫熟  
圖議之此亦萬代一時也伏願少留聖意閑暇念之天  
下幸甚陛下採臣芻蕘臣請執爰先驅爲士卒啓行橫  
行匈奴之庭歸報陛下臣死之日度無遺恨不勝云云

陳子昂文集卷之四

陳子昂文集卷之五

明都御史王廷校刊

門人黃姬水劉鳳同校

碑文

昭夷子趙氏碑

昭夷子諱元亮字貞固汲人也本居河澗世爲大儒至  
祖揆尤博雅耽道隋徵入學士與同郡劉焯俱至京師  
補黎陽郡長始居汲焉有二子禮輿禮輅輿官至臨潁  
縣丞輅爲校書郎並著名當代昭夷禮輿季子也元精  
冲懿有英雄之姿學不常師志在遐遠年二十七褐衣  
游洛陽天下名流翕然宗仰郡蒙以初筮求我昭夷以



玄轂發機故蓬居窮巷軒冕結轍時世議迫阨不容其  
高乃屈身泥蟠求祿下位爲幽州宜祿尉到臧逾歲默  
然無言唯採藥彈琴詠堯舜而已州將郡守穆然承風  
君之道標浩如也因巡田入隴山見烏支丹穴密有潛  
遁之意蒼龍甲申歲在大梁遭命不造發瘡疾而卒時  
四十九嗚呼哀哉天下士人聞之知與不知莫不爲之  
垂涕蓋傷其有濟世之量而無長世之年夫上德道全  
器無不順中庸以降才好則偏有張也之疇無展也之  
道好由也之勇緬回也之仁侈宰予之言遺澹臺之行  
務端木之智忘審武之愚或正而不奇或達而過雜君  
獨五味足六氣和通衆賢之不兼暢群才之大適雖不

至於聖道其殆庶乎故人無間言物飽其義吾嘗論人  
事有十君得其九一不至者命也夫於戲名聞天下而  
不達於堂上智周萬物而不適乎一人也其時歟其事  
歟君故人雲居沙門釋法成嵩山道士司馬子微終南  
山范陽盧蒧用御史中丞鉅鹿魏元忠監察御史吳郡  
陸餘慶秦州長史平昌孟詵雍州司功太原王適洛州  
參軍西河宋之問安定主簿博陵崔璩咸痛君中天鼎  
銜不實百代祀德故老或云以爲名者德之表謚者行  
之跡君囊括世道屯位明艱困乎艱旄光景不耀乃共  
稽陟舊行考謚定名問於元著象曰明夷于昭夷昔歎  
才位不兼大運有數嘗哀時命而作頌云諸公以余從



君之遊寂久故秉翰叅詳叙其頌曰人道宏運方物各有時匪時不生兮匪運不成昔者元精回瀟陽九滔灾大人感生堯禹恢能陰陽既和玄帝傳家五百數終桀驚暴邪子乙提運水火革期匪賢不昌尹乃阿衡六百運徂受始淫狂西伯考元歷在躬昌匪雄不決匪謀不歲姜牙皓首實逢其良投釣指麾奄有八荒周有天下七百餘年太公之後不聞大賢豈無仲尼負道周旋無勢一契無土一塵然則大運之所來時哉時哉時隘業隘運巨功巨苟非其時草木為伍昭夷作頌爾又嘗著汲人默記言變化之事且曰清爾靈龜永晏息乎浩初臨邛縣令封君遺愛碑

叙曰蒼生蚩蚩其動也直蓋顛蒙乎聖人顛顛其汲也

汲也下疑有脫誤

教務王皇中乎則時至其理衙之君公弼其

機馭之師之非能駿尊上帝保又黎元誰則荷天之寵

祈人之爵行其禮樂驟覩於中和裕其庶平載聞於謠

訟我之遺愛者不從事於是邪嘗試論之公名某字某

渤海蓀人也昔后稷有德於邵文王受圖於鑄珍符冊

命始自於西周珪社建侯奄荒於東土裘鼎軒冕有家

代焉魯祖子繡齊穎川渤海三郡太守霍州刺史隋通

直郎通州刺史榮分麾蓋道邁循良時雨洽於齊陳惠

風祕於唐楚祖德於北齊著作郎隋扶風郡南陽縣令

芸局觀奧見天下之圖石柱聞琴知君子之化父安壽



皇朝尚衣直長懷州司馬豪州刺史湖州刺史良二千石聞乎共理之尊肇十二州策多刺舉之首公則使君第其子也冲和誕命光大含章實公侯之子孫有山河之氣象明不外飾默昭於玄機敏實內融養蒙於用晦故其廉不直物恕不由衷崇善足以利仁自疆足以從事有朋友之信焉有閨門之肅焉非夫恭人其孰能景行行之者也年始若干爲國子生言從大學之遊以觀先生之道某年以明經擢第解褐守恒州叅軍秩滿補許州司法叅軍許惟舊國陳實多巫君子豐明利用乎獄載以課取累加秩焉又轉沼州司兵叅軍藜臺栒服一旦成市非利器者政以多荒公實佐之官無留事信

矣乎能其理者有其任濟其業者享其功我豈蒙求物思其理某年選補臨邛縣令夫蜀都天府之國金城鐵冶而俗以財雄弋獵田池而士多豪侈此邦之政舊難其人公按轡清途下車而宰覽其謠俗永歎於良圖想其風流慨然於惠化以爲太上之理因人者也通變之機隨時者也必使無訟不亦由吾用乎利貞夫何在物於是謀其教令肅其儀刑敬其事以順其人正其聞以利其義以爲昔者聖人之務本也在乎稼穡有稼穡然後可以養人故公之勸人也用天之道分地之利以爲昔者聖人之利用也實在財貨有財貨然後可以聚人故公之化居也買遷有無和其衆寡以爲昔者聖人之



事生也謹其制度然後可以富故公之節用飲食有節  
車服有數以爲昔者聖人之事死也慎其喪祭有喪祭  
然後可以睦人故公之送死也葬之以禮祭之以禮以  
爲昔者聖人之用獄也崇其法制有法制然後可以禁  
人故公之恤刑也唯齊非齊有倫有要夫如是者豈苟  
其利哉惟欲潔乎其源正乎其本慎之於謀始要之於  
用終將吏欵數矯虔而是以息孤寡不穀而是以寧者  
哉夫然後磨之以仁琢之以義使男女異路斑白不提  
熙乎其若春肅乎其若神然後文以禮樂幾乎以淳朴  
道豈遠乎嗚呼旻天不悅降此荼毒某年以大夫憂  
去職于時公之莅始逾年矣然三載考績是用未成百

姓哀惶人吏嗟 然咸云我叔矣而人悴矣鄉望老人  
前某官等五百餘人或金隄之秀玉宇之英而服美於  
寬允嚴祗於教義遂走之州府訴之上官冀奪其哀摧  
禮終秩不謀而同者日有百數司馬元公帝王之胤也  
康歌協化盛德在人憫丞庶之求思嘉我君之懿績以  
爲古之借寇者何以踰是哉遂用疇咨舊章允懷昨誦  
奪之公禮上之于文昌臺非將協贊天工慰彼黎庶君  
子之教而日見之哉班白之老胥史之徒又以天子在  
宸勤於孝理我君云邁誰其嗣之千餘人復連表詣闕  
投匭乞君以墨綬從事遑遑焉若有望而未至也鬱陶  
增思寤寐永歎將欲思謨不朽想見懿德乃相與言曰



昔者君子思其人而愛其樹蒙其澤則歌其詩封君之仁我無金石乎又述其行狀訪余以銘勒之事縣丞等有弼諧之美力筆之能永思清風歎息仁化尉安定梁慎盈知名之士也墨妙幾於草聖文義總於辭雄昔仕京畿左遷此職自以爲贊封君之化有日矣承封君之德有年矣夫其忠信之教寬猛之機古之官人君其殆庶乎父老之請允矣余竭耒舊國傳據其實恭聞其去思而親覩其遺愛余所備者敢博斯文猶懼後生有言以爲口實河東薛稷隋內使公之孫也文章之伯爲時所宗故憑其實錄寄之爲頌其詞曰

天地之間有渤海馬伯宗伯谷神山在焉精氣飛騰生

良宰焉良宰寔生代祿代鄉君達好遺風雲上征武興察孝州郡有聲陳其弓治戴其簪纓筮仕斯邑我龜觀貞深期高悟絕策遠明旣至肅肅其來英英臨事若祭視人如嬰三農敏用不獄以情輕重共用穀貨以平我裳旣襲我簋斯盈於惟我君張仲孝友家膺五福堂享三壽溫清不違喜懼無守枯魚御素疾風過牖匪降自天誰執其咎棘心劬勞匪我伊蒿彼蒼不弔惟其永號借寇爲請惠此嗷嗷曾是奔告謂天蓋高昇仙橋下赤車使者客於臨邛文雅雍容觀風萬里謁帝九重嗟嗟其舊椎牛擊鍾門於君墨借翰雕龍專思君兮不返伐石登山山高兮望遠懷車馬於言告欲絃歌於言偃人



寔去思我無愧詞

續唐故中岳體玄先生潘尊師碑頌 并序

尊師業尚冲密勤慈幽深理心事天所保惟嗇絕聖棄  
智不耀其光故真盛冥期珍圖秘學性與天道不可得  
而聞也若乃崇標曠迹遐情遠意志摩青雲蓬視紫閣  
高宗每降鑾輦親詣精廬尊師身不下堂接手而已每  
歎曰大丈夫業於道不能投身霄嶺滅景雲林而疲痾  
此山以煩世主吾之過也遂欲東求蓬萊孤舟入海属  
天皇敦篤斯道祈款逾深踟躕山隅絕策未往既而金  
革有命鑿轡遺區於戲昔始射有神人堯輕天下崆峒  
有至道軒后順風玄真高蹤萬古同德何其盛哉尊師

有弟子十人並仙塔之秀然鸞姿鳳骨眇愛雲松者惟  
隰川韓法昭河内司馬子微皆稟訓瑤庭密受瓊室專  
太清之業遺下仙之儔谷汲芝耕服勤於我蓋歷歲紀  
也始尊師受錄於茅山昇玄王君王君受道於華陽隱  
君陶公陶公至子微二百歲矣而玄標仙骨雅似華陽  
矣階真蹈冥練景遊化者其必有類乎法昭等永惟尊  
師靈跡洞業高深邁古而棄世往矣其若之何乃斷石  
幽山申頌玄德其頌曰

觀元化兮求古之列仙得瑤圖與金鼎信元符之自然  
仰與道而惟一天與人兮相連苟精守以專密必駕景  
而凌烟丹丘不死兮羨門弟子黃宮度世兮吾體玄體



玄之至德兮洵淑美冲心養和寶元始初學茅山濟江  
水乃入華陽洞天裏道逢真人昇玄子授以寶書青台  
旨令守崧山玉女峯雲栖窮林今五紀聖人以萬機爲  
貴而我以天下爲累聖人以大尊爲尊而我以天下爲  
煩是以真居於嶢嶸寄遺跡於軒轅有唐高宗兮天子  
之光好道樂仙思雲鄉千旌萬騎兮翠鳳凰邀我汝海  
兮箕山陽朝拜白茅夕紫房齋心潔意緬相望祈問玉  
真及玉皇何以得之受天昌黃庭中人在子身窅窅真  
真情一作甚真去汝驕氣與淫神勤能思之道自親遂  
解形而遺世乘白雲以上賓弟子不知其所如也乃刻  
石以思其人

漢州雒縣令張君吏人頌德碑并序

至哉天子在穆清之中端玄默之化萬國日見百姓以  
親誰其昭宣令長其任也然則國有小大政有污隆遭  
其和平則循理之功易值其凋瘵則革弊之業難况罹  
乎荐瘥救其塗炭力倍於中而功不半之則盡其仁而  
澤未全洽則我府君當欽明之世承苛慝之蓋緝頽靡  
之餘遂能撫寧矜殘淳耀敦懿改制立憲昭德顯仁竒  
跡光乎曩賢惠風穆於茲日我行千里而得一賢傳曰  
夫用我者而豈徒哉府君姓張氏名知古蓋漢少傳留  
侯之裔也昔留侯得滄海力士東執於秦遇黃石老人  
西歸於漢山河鍾鼎子孫保之世在關中今爲宜州人



也高祖藝周恒州司馬曾祖歡隋許州司馬祖雄唐并州榆次令考琳原州平原令皆稟瑚璉之器著經濟之才大位不躋元德滋茂其昭祉復襲於我府君府君體英竒之姿冲希默之量齊敏內肅端簡外融夫其孝友睦婣研幾成務深斷守節之固撥煩簡要之能在於家邦聞其政矣起家補同州朝邑尉歷太州鄭縣尉左金吾衛倉曹參軍洛州洛陽主簿黃圖左翊豪俠所湊赤墀佐理寔賴其能又遷雍州明堂縣丞時皇帝恭默明臺清問下吏西南矜寡有詞上官曰刺史沓貪而苛縣令威施而忍奸宄因豐群行效數哀哉昨黎顛在荼毒朝廷憫之帝曰俞之哉乃用勅撫此荒邑噫嘻昔者苛

政未作封境保安茲都衝要襟帶全蜀百濮兼錯萬裔之泉寶利珍貨盡四海矣殆殘猛肆至蠹賊內訌始於碩鼠之侵終屠餓狼之噬杼軸既盡郭邑殆空悲夫仲尼云苛政虐於猛虎豈猛虎而已哉我府君殷然始宣皇明恭職事巡省黃髮周爰令圖所以綏亡固存蠲虐去暴與百姓更始者與人斐然乃作誦曰我有聖帝撫令君遭暴昏椽悍寡紛民戶流散日月曠君去來兮惠我仁百姓蘇矣見陽春然不躬不親庶民不信於是府君知人散久矣黷於詐罔已曰未遂躬六曹之務先五美之訓下官斂手牟食革心人始翕如也初官戶在版圖者萬有五千餘家歷政侵殘逃者過半歲月永久廬



五章美公化行而奸慝不興也其六章善政令平均賦  
歛不淫也時日月會于龍猶歲功成乎孟冬百嘉備烝  
品物咸乂府君乃稽版籍攷幽明親巡乎邦廬存問乎  
鰥耄黃耆稚齒山原之民乃接手賡歌迎擁馬首累乎  
道路者以百千輩晝肆酒夜聯燭群舞蹈詠迎途餞郊  
皆歌前六章慶公惠也是以封內歡康境外萌動企公  
德美有若神明府君嘗因公事至成都成都之民駕肩  
相矚蓋籍甚其異也封人有喪者廬于墓側鞠然在疚  
負土成墳公親從寮吏吊其苦蓆自是禮讓行焉學校  
興焉長史河南竇公旌別尚賢庶簡居政以公甄理頽  
弊躋美中和歷政逋亡一朝狎至遂表其狀奏之于闕

庭屬獯鬻孔亟戎車未暇郊壘旣夷邦憲清穆刺史南  
陽張公愔愔卧理寬猛以濟儒術兼優吏畏獨坐人歌  
來暮甄綜品鑒物無遺才又以公保邦乂民勝殘去殺  
重理前秩昇聞宸扆夫昇聞者豈循良而已哉蓋激清  
勵貪聳善懲惡祈元嘉命優公寵章於是鄉旄邦彥華  
髮杼首或名淹玉壘家擅銅山如王弘馬靖等若干人  
皆以政治仁顯功著頌宣揚金帛嘉止不日而至至則  
國肥矣去則民瘠矣凡我邦族其將疇依兄弟睦親不  
可以從往也筐篚玉帛不足以永貺也隔千里而不昧  
與百姓而長存非刻金石列圖象揚弘懿崇耿光則顯  
然衆情孰克慰滿於是乃從旅鑿巉巖自金水之山得



井湮無蠨蛸在堂蟋蟀空歎先是有勅天下逃人歸復  
舊業者免當年租庸公以柔遠能邇政之大端乃下令  
曰於戲天子誠憫斯人是用命我其訖有濟若逋不及  
惠幽不能明吾之罪人部內有逃越他境能相率歸者  
免一歲租及征徭若惇嫠貧窶不能自濟者當別議優  
之其長正耆老可明喻此誠使被幽谷令既下克已示  
信或有逃者引首而歸公親循寧憫贍理其業於是小  
大悅賚遠近承風四封諸逋一朝景附夫負妻戴子荷  
簑提笠首尾郊郭者凡七千餘家熙乎若鴻鴈之得春  
也既至矣則勞來之既止矣則安輯之或三年或十年  
舊館已無喬木猶在公緝屋塗室雍陌開阡爲其井疆

人得其居矣田畷失業農野榛荒此邦膏腴利在江浸  
有金鴈白魚二水是其朝雲澤麓無虞溝畛填塞公濬  
其塗洫川澮始通人得就畊矣流亡初復貧鞠兼半食  
不糊口力未贍農公又假富資貧耦耕分種助其銓刈  
歲以有年人得其食矣曩者征稅橫斂商旅不行貿遷  
有無屢肆半絕公阜其貨財交易復通日中噬嗑人得  
其利矣乃種樹畜牧蚕漁工賈什伯之器車服之庸婚  
姻之時喪祭之禮莫不盡爲度數制其權衡征賦既均  
千室如一於是百姓允賴鼓舞而歌其歌詩凡六章題  
曰逃還樂其首章蓋言天子之德也其二章憫前政之  
虐也其三章喜公惠之至也其四章言逃還之樂也其



五章美公化行而奸慝不興也其六章善政令平均賦  
歛不淫也時日月會于龍狔歲功成乎孟冬百嘉備烝  
品物咸乂府君乃稽版籍攷幽明親巡乎邦廬存問乎  
鰥耄黃耆稚齒山原之民乃接手賡歌迎擁馬首累乎  
道路者以百千輩晝肆酒夜聯燭群舞蹈詠迎途餞郊  
皆歌前六章慶公惠也是以封內歡康境外萌動企公  
德美有若神明府君嘗因公事至成都成都之民駕肩  
相矚蓋籍甚其異也封人有喪者廬于墓側鞠然在疚  
負土成墳公親從寮吏吊其苦蓆自是禮讓行焉學校  
興焉長史河南竇公旌別尚賢庶簡居政以公甄理頽  
弊躋美中和歷政逋亡一朝狎至遂表其狀奏之于闕

庭屬獯鬻孔亟戎車未暇郊壘旣夷邦憲清穆刺史南  
陽張公愔愔卧理寬猛以濟儒術兼優吏畏獨坐人歌  
來暮甄綜品鑒物無遺才又以公保邦乂民勝殘去殺  
重理前秩昇聞宸宸夫昇聞者豈循良而已哉蓋激清  
勵貪聳善懲惡祈元嘉命優公寵章於是鄉旄邦彥華  
髮杼首或名淹玉壘家擅銅山如王弘馬靖等若干人  
皆以政治仁顯功著頌宣揚金帛嘉止不日而至至則  
國肥矣去則民瘠夫凡我邦族其將疇依兄弟睦親不  
可以從往也筐篚玉帛不足以永貺也隔千里而不昧  
與百姓而長存非刻金石列圖象揚弘懿崇耿光則顯  
然衆情孰克慰滿於是乃從旅鑿巉巖自金水之山得



王政之石農夫田婦担扛力運皆懼公往遺像莫瞻共  
琢之磨之議之謀之子昂時因歸寧采藥岐嶺父老乃  
載酒邀諸途論府君之深仁訪生祠之故事永我以典  
禮博我以文章夫千里一賢義者所貴今日城一理公  
獨有之不熙其烈光以示當世則孱弱者胡以激節貪  
垢者曷以悛心敢因此義乃昨誣而作頌曰頌缺

九隴縣獨孤丞遺愛碑

彭州九隴縣丞獨孤君有恭懿之行柔毅之才臨官以  
莊敬事而信清白苦節勤恪原躬廉而不矜利以不逸  
有特立之操焉在位四年無一日自倦精專力務澤潛  
氣通天彭之人陶然大化居秩歲滿單車告歸邦思其

仁國詠遺愛乃樹碑刻石追崇厥庸既頌歎之又思福  
之以金仙世尊慈善萬物遂貢金鑄像祈祉冥休悠悠  
之人至今稱賴夫官不必貴政惟其才獨孤丞上迫宰  
君下雜群尉文墨教令不專在躬然力行務仁推誠愛  
物謳吟者不歌其宰頌議者必歸於丞豈欺也哉吾每  
聞一言可以永寧天下者在能官人而已苟謬其任綱  
維以頹感獨孤丞智效一鄉惠孚百里况其大者乎於  
戲官人哉乃作頌曰

於維國家建官以理得人則盛匪人則圯英英我君清  
節素履恭寬敏惠將順其美禮實在躬人以知耻歲秩  
其暮薄言歸止祁祁吏人何嗟及矣涕戀沱若遺愛罔



已瞻德樹碑造真祈祉不有其惠孰能享此悠悠彭門  
千載有紀

唐故朝議大夫梓州長史楊府君碑

君諱越字復珪弘農仙掌人也其先帝高辛氏之裔周  
有天下晉受其封至宣公伯喬草基楊若乃彤弓旅矢  
秬鬯赤芾則禮命之樂歌之崇天王之寵光保元侯之  
休祉其後十六代有楊寶者天錫黃鳥授以白環若曰  
命君子孫世登三事迨震康彪賜四代五公烈光昭于  
漢室盛德克於海內金圭銘鼎至今爲弘農世家也高  
祖椿魏尚書右僕射開府儀同三司司徒公進位太保  
加侍中給後部鼓吹致仕歸邑賜安車駟馬傳制二人

可謂國之元老帝之師臣功成名遂社稷之寶曾祖思  
善齊通直散騎常侍祖敬通鎮遠將軍鄭州治中烈乎  
名節公即芮城府君之第二子也少而冲嶷苦節貞素  
禮非玉帛室有琴書聞少連之風而悅之度乎身中權  
行中清上以察乎道下以敦乎物不應州郡之命而有  
金玉之心嘗歎曰以明月珠彈千仞雀吾不能也於是  
觀寶龜之象心滅朶願探金虎之爻志存幽履遂去家  
遁于嵩山經十餘年丹山白雲之志眇然矣屬太宗文  
武聖皇帝初臨天下物色幽人焚山勝道網羅遺逸君  
子若曰天下有道可以見矣於是始以角巾應命褐衣  
詣闕陳大道之宏暮論至公於天下帝曰俞爾言乃可



底行若歲大旱用汝作霖雨今南山近塞北漠連胡石  
州邊烽皇化未謐汝徃欽哉輯乃人禦乃敵以息匈奴  
之患始解褐授石州方山令樽俎在堂干旄在階布大  
信於獯戎示折衝於衽席威名震曜乃昇聞也有勅授  
憲臺監察御史繡衣始拜珥筆昇朝臺閣以之生風豪  
貴由其斂手又勅直中書待制未幾又遷秘書郎直中  
書自如故遊鳳凰之池觀蓬萊之府是天下之榮踐也  
又轉宗正寺丞歲餘帝思南史之才將崇東觀之美又  
遷起居郎加騎都尉龍朔中天子將觀兵於東夷以復  
先帝之業凡居中者多出守旁郡是歲授公朝散大夫  
除冀州司馬又轉魏州司馬皆知州事于時天下雌韓

而雄魏壯武而柔文公始厭承明初臨外郡探九聖而  
犯禁崇姦欲嘗朱博之能以觀龔遂之政公深鈎潛往  
英機立斷短服赭裾於是乎理麟德初兼梓州長史蓋  
在華之南區彭之北鄙人豪俗侈政削公峻攢六國之  
遺氓雜三邑之奧壤公下車問俗觀風立政先之禮讓  
敦以詩書抑浮窳禁蝨食至於堂叩鐘磬家擅山川莫  
不爲之節制行其典禮會來之頌復起於斯時高宗大  
帝方接千載之統昇中太山玉帛雲趨朝者萬國公預  
陪金蹕侍拜瑤壇白雲旣封皇慶斯洽加朝散大夫餘  
官如故東山拜命西駕未歸逢太歲之臨辰感殷楹之  
夢奠遇疾薨於官舍時年六十四嗚呼哀哉遺令薄葬



不藏珠玉唯孝經一卷堯典一篇昭後嗣不忘聖道即以某年月日葬於西嶽習仙鄉登仙里之西麓遵遺命也嗣子嘉賓等哀號泣血柴骨樂心緬惟罔極之恩恩崇永錫之道以爲吾丘子沒無助冥因季由也歎空勤負米於是攷群聖之典探衆妙之門求所以昭報幽冊贊祉冥籍則云金位慈救寶手來迎若德崇於此則功濟於彼是用歸滅真諦祈祐能仁籍鐵圍而寫容現金蓮而得像遂於登仙麓瑩之側造阿彌陀像一軀坐高三丈并象變菩薩天人畢備全金湧出衆寶裝嚴雲仙鬼神周羅上界珠幡羽蓋圍所以不顯尊靈尤惠業達人能事畢矣孝子之事親終矣銘曰

巖巖大岳浼浼長河歆雲滃霧含靈佇和陽候之國寔其中阿子孫瓜瓞軒蓋駢羅○四代五公自于伯起蟬聯彪懿令聞不已二千戶侯三十刺史世濟其榮至我君子○我我君子皎有令光不寵我組而括我囊洗心巖遁抗跡雲翔冥鴻不遠白駒在場○解其羅袂縮我墨職還翔多虞獫狝孔棘之子之往允威允德干旄在階烽火罷色○行行駿馬繡衣之光烈烈董狐司史之良而我君子總其徽章出同巖助政穆王祥○雄魏旣康鄴蜀猶侈攬轡言邁題輿載理尺兵允戢亂繩攸靡天子登封拜服玉趾○大禮旣畢歸路遲遲歲亦秋止天不憇遺嗚呼斯吏號泣漣洏曷其往矣來暮歌思○



卷五  
五  
煢煢孤子棘心哀疚永號昊天眇泣冥祐蓮花之國金池玉露宗此香緣生彼穠秀○全金旣湧衆寶斯莊攷墳其左叔塋其旁香花園繞松栢成行千秋萬歲祚祉無疆

梓州射洪縣武東山故居士陳君碑

君諱嗣字弘嗣其先陳國人也漢末淪喪八代祖祗自汝南仕蜀爲尚書令其後蜀爲晉所滅子孫避晉不仕居涪南武東山與唐胡白趙五姓置立新城郡部制二縣而四姓宗之世爲郡長蕭齊之末有太平者兄弟三人爲郡豪傑梁武帝受禪網羅英豪拜太平爲新城郡守尋加本州別駕弟太樂太蒙蒙爲黎州長史都督護

南梁二郡太守樂爲本郡司馬卽君之高祖父也生曾祖方慶好道不樂爲仕得墨子五行秘書而隱於武東山生烈祖湯仕郡爲主簿遇梁季喪亂避世不仕生皇考廣迥迥早卒君卽迥之第二子也少孤而有純德恭已飾行一日三省家世本以清白崇德迥君之孤素業空矣君有仁兄養母以孝君順至行同勤苦節夏不避暑冬不避寒蒸蒸服事行年四十有五入則孝出則弟謹而信汎愛衆而親仁無餘力也以是不憂於道逮親終歿春秋已高從事不可以養矣乃輟干祿之學修養生之道山壑高居農野永歲雅聞漢有王丹者隱居不仕家累千金以自奉田稼勤者載酒肴從鄉里承化以



相懲沮乃歎曰彼王丹者是爲政矣奚其爲政也由是始致林澤闢良田習山書務農政天道時變地道化成丘陵泉藪星歲雲物靡不用心也原田莓莓粳黍稷穰汝陽之稼如雲矣春日載華歲聿其秋白露時降百穀收熟君常乘平肩輿省農夫饋田畷刑以肅惰悅以勞勤若孫吳之用兵鷙鳥之搏擊也卓彼碩田歲取十千倉庫寔崇禮節恤惇寡賑窮乏九族以親之鄉黨以歡之居十餘年家累千金矣其鄰國有媮衣食帶刀劔椎埋胠篋之類鬪鷄走狗之豪莫不靡下風馴雅素曰里有仁焉吾何從也遂順浮瓠之節肅恭儉之行修孝悌節廉耻將欲效君之素業也時年已耳順素無經世之

林園遺老玄默忘歲遂保先君武東山之故君行不由徑非公事未嘗至於州縣也昔襄陽有龐德公公谷口有鄭子真東海王霸西山呂才皆避世之人養德退耕以求志軒冕不可得而羈憂患不可得而累逮于我君作者五人矣於戲古者至人不利苟得而不務近貴量腹而食度身而衣非其道萬鍾不足豐也非其榮五鼎不足餌也躬勤耕植其杖而耘不答子路之問者豈我君之徒與綿綿羅網冥冥高鴻趨趨竹竿穆穆幽籠其與禍敗之遼絕胡越哉然則兩龔不免於蘭焚二老不免於薇歎其近貴利耶夫上無憂悔下無饑寒含道以制嗜慾達命以順生死仁以愛身智以養德俾爾耆而



艾俾爾昌而熾君子保之以永壽攷非我君者乎享年  
八十有五太歲壬辰五月十三考終厥命臨終戒曰啓  
予足啓予手我聞古人有言珠玉而瘞之是暴骸於中  
原也古者不封不樹後世聖人易之以棺槨吾不敢違  
聖人可具棺槨而已歛以常服墳無丘壠吾將度幾以  
奉先人之情也有子某等皆能祇奉遺訓聿從先志長  
壽二年龍集癸巳月日歲月載踰下兆時吉始啓殯昭  
告奉遷於舊塋武東山之陽禮也鄉里會葬者千餘人  
皆涕泣號慕悲純德之不見咸曰君子沒矣仁何以名  
陵谷不朽匪唯頌聲小子不敏謹述鄉人之教詞曰  
肅肅我祖國始於陳中裔淪喪泊此江濱山川隆鬱旂

鼎氣氤生我君子於鑠元直性孝肅悌惟仁善鄰樂我  
耕稼忘我縉紳茫茫田藪歲也其春農人肅事君子犒  
勤孰爲夫子植杖而耘弋者何慕鴻飛高雲楚狂懼世  
夷叔求仁良獨終夫不致于身我異於是非隱非淪撫  
化隨運安排屈伸天年旣沒長夜何辰聖達不免宇宙  
同塵桐棺三寸豈我窶貧自古有禮吾從聖人嗟爾百  
代子子孫孫驕奢自咎天道無親思我松柏恭儉是遵

子昂 集卷之五終



子昂 集卷之六

明都御史王 廷校刻

門人黃姬水劉鳳同抄

誌銘

府君有周文林郎陳公墓誌文

公諱元敬字某其先陳國人也五世祖太樂梁大同中  
為新城郡司馬生高祖方慶方慶好道德墨子五行秘  
書白虎七變法隱於郡武東山生曾祖湯湯為郡主簿  
湯生祖通通早卒生皇考辦為郡豪傑公河目海口鸞  
領虎頭性英雄而志尚玄默群書秘學無所不覽年弱  
冠早為州閭所服耆老童幼見之若大賓二十二鄉貢



明經擢第拜文林郎屬憂艱不仕潛道育德穆其清風  
邦人馴致如衆鳥之從鳳也時有決訟不取州郡之命  
而信公之言四方豪傑望風景附朝廷聞名或以君爲  
西南大豪不知深慈恭懿敬讓以德也州將縣長時或  
陳議青龍癸未唐曆云徵公乃田棲絕穀放息人事解  
雲母以怡其神居十八年玄圖天象無所不達嘗宴然  
坐謂其嗣子子昂曰吾幽觀大運賢聖生有萌芽時發  
乃茂不可智力圖也氣同萬里而遇合不同造膝而愕  
古之合者百無一焉嗚呼昔堯與舜合舜與禹合天下  
得之四百餘年湯與伊尹合天下歸之五百年文王與  
太公合天下順之四百年幽厲版蕩天紀亂也賢聖不

相逢老聃仲尼淪溺溷世不能自昌故有國者享年不  
永彌四百年餘戰國如麋至於赤帝之興四百年天紀  
復亂夷胡奔突賢聖淪亡至於今四百年矣天意其將  
周復乎於戲老矣汝其志之太歲己亥年七十有四七  
月七日己未隱化於私館孤子子昂愚昧鞠然在疚不  
知所從乃祇馴聖人卜宅之義是歲十月己酉遂開拭  
舊坐奉寧神於此山石佛谷之中岡也銘曰  
賢者避地邈其往兮鳳兮鳳兮誰能象兮嗚呼我君懷  
寶不試孰知其深廣兮悠悠白雲自怡養兮大運不齊  
賢聖罔象兮南山四君不遭漢天子固亦商丘之遺壤

兮



令其地有臺台之恠蟋蟀之人君黃鼎分中鳴琴不下  
鍾鼓既考風俗允和帝曰良哉而格我政加朝散大夫  
遷岐州扶風縣令昔尹翁歸以文武之幹緝熙此邦黃  
圖雖寧赤丸未弋君以庚斷甲距設旣投鈎赭裙始繩  
聖面咸革丁我敏侯艱遂茹哀苦廬銜恤終紀是歲申  
國不理元寮佇才制加朝請大夫授申州司馬屬大夫  
人有羸老之疾去官不之白華增勤綵衣是慕至於朝  
盥夕膳候色承歡瓊瓊齊粟蒸蒸不匱有若楚老萊子  
之爲嬰兒也嗚呼昊天不弔降我鞠凶大夫以眉壽薨  
時君年已七十二矣禮以飲酒而君絕漿虞以降哀而  
君泣血榮榮在疚樂棘其心新谷未升匪莪以殖以某

年青龍癸巳薨於其里第之正寢孝之終也嗚呼哀哉  
昔聖人五十而慕先予謂之正德今君七十二而盡其  
哀非敦篤允元深仁淑德者疇能離此哉夫人弘農楊  
氏隋內史侍郎丹川公演之孫女也幼有淑德而美令  
儀採蘋韶華穠荷比秀至於內嚴闈訓外匡君子麟趾  
以穆鷄鳴有章誠道暎公官事宣彤管晚年以儒因未  
究其業惟採遂揭無生之筌將遺有漏之屣顓潔道行  
受蓮花經理極翻三心滅不二形妄緣盡歸真化冥歲  
在丁酉處順而往始我府君以懸車之歲從負米之勤  
夫人亦能肅恭晨昏嚴祗左右夫至行莫大於孝崇義  
莫顯乎忠君克勤于家盡力於國刑于妻子至于朝廷



夫 而與物或有違 而無適 義所以此君好謙達  
禮研幾成務摹其法器無不馴從其事政無不理夫用  
我者而豈徒哉嗟乎矜而能廉利而不浼百行允備三  
事不階臧文仲其竊位與柳下惠其直道與有子四人  
長曰某官至武連縣令先公而卒次子某等皆肅奉嚴  
訓景行高山達於家邦光于禮樂永號罔極泣血昊天  
始府君臨終遺令薄葬墨龜未食青烏不封權殯于某  
所需吉兆也龍集己亥律躔應鍾金鷄鳴玉狗吠黃腸  
密啓丹旄徐飛始遷神於某原之陽禮也青龍在左朱  
鳳居右雙衾共封二室同窆珠玉不瘞丘隴誰傳刻此  
金石以旌後賢

唐水衡監丞李府君墓誌銘

君諱某字某趙國人也乃昔嬴楚睽孤豪傑雲起廣武  
君負霸王之畧爲成安之師實欲北與帝基南面稱創  
雄圖未展大運陵頽傳云有明德當代不顯其後必有  
昌者自武至君二十四代矣公侯寶玉刻鼎銘鍾紛綸  
歲蕤世濟不泯六代祖孝伯後魏部尚書秦州都督宣  
城公魏之名臣載在青史曾祖某後周陝州芮城縣令  
祖某屬隋運版蕩君子道消遜言遁時不顯於仕拜儒  
林郎父某唐隆州蒼溪縣丞襄州荆山縣尉有高才而  
無貴仕君鍾常山之氣炳障水之靈少尚名節躬行仁  
義始入太學以精理見知未幾進士高第拜白水縣尉



尋轉雲陽尉屈青雲之資從黃綬之任雖吏道迫屑而  
遐情眇然秩滿調補洛陽尉盤根利器尹守拭目遷懷  
州司法祿不徇榮位以行道推尚貞遜與衆趨少合洎  
上聞對策甲科授益州大都督府錄事參軍滿歲擢授  
水衡監丞君所居清澹仁惠為政識真之士以公輔許  
之而好學篤道介如石焉故位不克量縉紳高其才烈  
士伏其義竟不能驤首雲路長鳴天衢知與不知咸皆  
共歎有餘恨也而君浩然冥順獨與化遊方將幽探玄  
微精覈通變天命不祐春秋若干邁疾終于官某歲某  
月安厝于某所禮也嗚呼古所謂歿而不朽者有矣夫  
遺言餘旨粲然可觀有子曰某痛門風之將泯懼世業  
之罔傳乃刊石紀德銘旌之曰  
常山之靈和氏之英世有明德鍾此令名黃黻不貴洪  
璧為輕仕以弘道祿匪伯榮高志厲雲思機入冥嗚呼  
天平殲我國禎

唐故循州司馬申國公高君墓志

并序

君諱某字某渤海蓀人也昔周天子命我太公受封東  
海鍾鼎寶玉七百餘年故其公侯世有國祀曾祖勵字  
敬德北齊朔州大行臺侯射襲爵清河王改封樂安王  
周授開府隋授揚楚洮三州刺史我唐有命崇寵典章  
貞觀初贈恒定并趙四州刺史垂拱中又贈特進非明  
德上公孰享之哉



祖宗儉字士廉皇朝太子太傅上柱國申國公食邑三千戶贈司徒并州刺史永徽初贈太尉配享太宗文皇帝廟廷謚曰文獻昔帝光天下公實佐之至是元勳克配清廟父勲字履行秦府軍直千牛滑州刺史將作大匠金紫光祿大夫太常卿洪州都督上柱國申國公尚東陽長公主駙馬都尉衣冠禮樂盡在是矣故帝乙歸妹尚于中行公則駙馬之元子也含章丹穴籍寵黃扉承禮訓於公庭畫儀刑於士則年若干嗣封申國公十四解巾授千牛備身趨奉紫璋已有光矣秩滿補海監府左果毅都尉再遷游擊將軍右帥府郎將遂昇榮禁衛承寵司階千廬之務式遵八舍之榮攸襲又授朝散

大夫尚輦奉御再遷尚衣奉御屬宸宮構難巫蠱禍興坐堂第岐左遷循州司馬蒼梧南極桂海東浮

是唯篁竹之區而有山夷之患永隆二年有盜攻南海

廣州邊鄙被其灾皇帝哀洛越之人罹其凶害以公名

家之子才足理戎廼命專征且令招尉一作討公奉天子

威令以喻越人越人來蘇日有千計公乃惟南蠻不討

之日久矣國有大命將布遠方欲巡禦象林觀兵海裔

彼蒼不弔天我良圖因追寇至廣州遇疾薨於南海之

旅次時年若干嗚呼哀哉珠鼎之秀邦國之光負才能

重書劔方將克崇舊業祗寵前人降年不長永陸厥緒

嗚呼哀哉夫人京兆韋氏銀青光祿大夫太子詹事武



陽侯琨之第其女也有淑慎之德窈窕之賢長于公宮  
少習婦道年十六歸于申國鳳臺尊悶鵲巢斯在雖珠  
玉翡翠職是其儀而澣濯蘋繁不改其操故我君子琴  
瑟友之年三十儀鳳二年先公而歿其年權殯先塋嗚  
呼哀哉始公之適南喬也夫人逝矣死生言別永懷燕  
越之悲旌旒同歸終淪松柏之路先是公有命合塋弘  
道歲靈視自南海還嗣子紹等追惟永終仰遵先志與  
載初元年歲在攝提格始昭啓亡靈改卜遷祔某月日  
遂合塋於少陵原禮也嗚呼哀哉霸山南望秦川滿目  
紫臺鍾鼓方對於青春白楊上陵獨悲於玄夜紹等以  
東西之人懼岡陵之變古不樹今則墳焉

率府錄事孫君墓誌銘

并序

嗚呼君諱虔禮字過庭有唐之

人也幼尚孝悌不

及學文長而聞道不及從事祿值凶孽之灾四十見君  
遭讒慝之議忠信實顯而代不能明仁義實勤而物莫  
之貴陘厄貧病契濶良時養心恬然不染物累獨攷性  
命之理庶幾天人之際將期老有述死且不朽寵榮之  
事於我何有哉志竟不遂遇暴疾卒於洛陽植業里之  
客舍時年若干嗚呼天道豈欺也哉而已知卒不與其  
遂能無慟乎銘曰

嗟嗟孫生見爾迹不知爾靈天竟不遂子願分今用無  
成嗚呼蒼天吾欲訴夫幽明



故宣議郎騎都尉行曹州離狐縣丞高府君墓誌

銘

君諱某字某先渤海蓀人也。因仕居洛今為陽翟人。昔  
赭鞭乘運。襲炎帝之宗。蒼光應期。承太公之胤。崇勛霸  
業。光烈猶存。曾祖某。北齊太子中舍人。贈冀州刺史。青  
宮近侍。光寵朝班。皇蓋追榮。恩崇國禮。祖欽仁。隋左親  
衛。大都督。檢校秘書郎。帶七尺劍。始遊天子之階。持三  
寸筆。終入芸香之閣。父柚。唐江州潯陽縣令。舒州懷寧  
縣令。絃歌之化身。不下堂。神明之威。垂蝗避境。君卽懷  
寧府君之長子。黃河一直。青松萬仞。性惟仁孝。行實溫  
恭。文義必以潤身。名節由其狗物。唐龍朔元年。有制舉。

忠鯁君對策及第。試守秦州湘源縣尉。位卑黃綬。志在  
清規。秩滿以常調。補鳳州黃花縣丞。梁竦長懷。尚勞州  
縣。桓譚不樂。空負琴書。又轉易州遂城縣丞。以管輅之  
林。趙典之任。古人斯在。君子居之。大周革命。任曹州離  
狐縣丞。而春秋日月方出。武盡美矣。不得夷齊之臣。文  
哉郁乎。自邈夏商之道。於是因階秩滿。告老歸閑。閉郊  
扉于南野。習巖居於東澗。詩書琴酒。以觀先達之風。山  
水丘園。將為遺老之賞。天授二年。歲在單闕。七月二十  
日。攷終厥命。卒於陸渾縣明高之山庄。時年七十有二。  
嗚呼哀哉。君雅尚節義。素履元亨。懷古人之遠圖。慕先  
賢之遺烈。以為桓黓石椁。非則於禮經。墨翟桐棺。寔宜



於聖典遺令薄塋務取隨時卽以其年十月塋於北邙  
山平樂之原禮也嗣子思恭孝思罔極喪制過哀思封  
樹而緬懷恐東西而不志白楸爲椁爰遵古塋之儀丹  
漆題封卽表永年之記銘曰

泱泱大風其太公兮穆穆君子紹厥宗兮忠鯁察廉仕  
漢宮兮高才位卑攷終命兮哀哀孤子號蒼穹兮歸塋  
平陵栢松桐兮

○唐故袁州叅軍李府君妻清河張氏墓誌銘

夫人清河郡東武人也昔軒轅錫胤孤矢崇威畏其神  
者三百年得其姓者十四族金貂七葉漢天子之忠臣  
排足三公晉武皇之名相孤卿玉帛世有其庸曾祖

北齊太常卿徐兗二州刺史天人之禮位掌於秩宗侯  
伯之尊寵優於露冕祖某隋汾陰壽春陽城三縣令襲  
公侯之瑞屈銅墨之班士元非百里之才太丘有三台  
之望父唐戶部侍郎復毫建三州刺史尚書北斗始贊  
於南稟柔成性蘊粹含章承禮訓於公庭習威儀於壺  
則夫其窈窕之秀婉孌之姿貞節峻於寒松韶儀麗於  
溫玉鉛華不御飾環珮之容浣濯是衣勤黼黻之綵自  
作嬪於君子主中饋於家人三千之禮不違九十之儀  
無慝至乃恭於奉上順於接下仁孝以承宗祀慈惠以  
睦閨門則雍雍踳踳必由其道矣嗚呼府君不造遭此  
閔凶中年不圖早世而殞青松摧折哀斷女蘿之心丹



桂孤高終守栢舟之誓。而府君食先人之德。無後生之財。夫人狗黔婁之貞。闕丹臺之產。孀居永日。蓬首終年。處貧素而彌堅。保幽芳而不昧。始府君之逝。有四子焉。少遭罔極之哀。未奉過庭之訓。夫人保持名教。終始禮經。既勗之以義方。又申之以遠大。皆能率由慈訓。克荷嘉聲。箕裘之業。載隆。燕翼之謀。不殞。非夫淑明賢懿。聖善溫良。崇婦道之深規。弘母儀之至範。能昭宣令聞。若斯之盛哉。彼蒼不忱。殲我眉壽。春秋若干載。初元年月日。邁疾終于洛州某里之私第。嗚呼哀哉。夫人令儀。有穆惠聞。無喧敦雅志。於詩書婉媚情。於琴瑟若乃姆。師酒食之儀。女工纂組之業。莫不總制清理。弘宣懿則。

茂蘋蘩之雅訓。協沼沚之芳猷。古稱敬姜詩云。淑女論容比德。殆無以過。穠華不居。松栢永閔。嗣子某等。悲摧欒棘。思結寒泉。永惟同穴之儀。仰遵歸祔之典。以大周天授二年二月日朔。遷祔於袁州君之舊塋。禮也。合塋非古。奉周公之儀。墓而為墳。宗仲尼之訓。嗚呼。鴛鴦之樹。眇泣於松楸。鼓吹之列。緬然于丘壠。原陵何代。銘誌無文。有哀黃鳥之詩。遂勒青鳥之兆。銘曰。

詩云。淑女君子好逑。懿哉令德。嘉儀聿修。溫容玉映。峻節松楸。妙心彤史。潔志玄猷。昭宣壺則。惠穆蘋洲。共伯早逝。貞姜獨留。筑居蓬首。哀深栢舟。彼蒼不憖。此夜長幽。懷南風之吹棘。想北隴以同丘。青春兮白日。獨昭昭。



以悠悠

上殤高氏墓誌銘

維唐垂拱二年太歲景戌七月二十日殤子高氏卒嗚呼哀哉瓊敷而不玉寔者有矣夫吾觀顛元機化出入天壽之數榮落之原皆一受而不易者也悲夫古人之仁懿中庸不幸短命今復見之於高子子渤海蓀人也黃州府君之幼孫苑丘府君之叔子生而岐嶷寔覃寔華越在襁褓神明滋茂童蒙淵敏光潤玉顏八歲始教方書受甲子已知孝悌之道詩禮之規苑丘府君鍾愛之他日嘗趨庭與諸兒戲神情渾泳綽然如鴻雛鶴子有青雲之意也府君美之曰能光我家者此兒十五

左氏春秋及尚書淵騫之志日新宏大矣不幸享年十七遇疾而夭嗚呼哀哉苑丘府君感慟哀過於禮不恨爾壽之不长惜爾器之不彰夫何苗育今也則嗚呼吾將老矣遠爾何哉某年七月殯於家園日月云徂六載于茲矣天鳳二年龍集辛卯府君方大崇元域以安先兆諸子之柩皆附焉其年一月癸卯朔十八日庚申啓殯歸瘞之塋禮也銘曰  
來不可遏去不可止唯死與生由生以死於戲殤子竟何往矣傷慈父之肝情獨真真而長已死而有知可也若其無知悲爾

堂弟孜墓誌銘 并序



君諱攷字無怠其先陳國人也六代祖太樂梁大同中  
爲本郡大司馬生五代祖方慶屬梁亂始居新城郡武  
東山高祖湯爲郡主簿生曾祖通早卒通生皇祖辯少  
習儒學然以豪英剴烈著聞是以名節爲州國所服皇  
祖生攷元爽保植先人茂德降生於君幼孤天資雄植  
英秀獨邁性嚴簡而尚倜儻之竒愛廉貞而不拘分獨  
之操始通詩禮畧觀史傳卽懷軌物之標希曠代之業  
故言不宿諾行不苟從率身克已服道崇德閨門穆穆  
如也鄉黨恂恂如也至乃雄以濟義勇以存仁貞以立  
事毅以守節獨斷於心每若由己實爲時輩所高而莫  
與倫也是以鄉里長幼望風而靡邦國賢豪聞名而

悅服方謂拂羽喬木緬昇高雲而遭大過棟橈而殞嗚  
呼天降吊平時年三十五是歲龍集癸巳有周天授二  
年七月卜兆不吉權殯於真諦寺之北園始以今甲午  
歲獻春一月巳酉朔二十五日巳酉定于石溪山之北  
岡陪秀墳也君家世墳壠在武東山昭穆崇封松柏列  
盛至君攷遺令獨愛石溪之岡故君從先志祔葬于此  
嗚呼哀哉始君伯父海內之文人也含純剛之德高代  
之行每見君嘆曰吾家世雖儒術傳嗣然豪英雄秀濟  
濟不泯常懼後來光烈不象先風每一見爾慰吾家道  
實謂君有逸群之骨拔俗之標超山越壑可以駿邁也  
豈其天絕喪茲良圖嗚呼其元命歟遭命歟天不忱歟



道固謬歟大圓蒼蒼大方茫茫賢聖同此爾之何傷古  
人有言珠玉而瘞是暴骸於中原况吾家道尚儉名訓  
未墜封樹之禮吾敢過焉是用錫爾瓦木之器塗芻之  
靈堯舜之典忠孝之經昭示後代以安爾形銘曰  
我祖之歲蕤兮邈於陳緬遥裔兮此江濱五代崇光兮  
至夫君徽烈英曜兮始氛氲何意嚴霜兮降青春玉樹  
雅落兮成黃塵南山無隙兮永幽淪悠悠昭代兮卜爾  
辰吾慟感傷兮號蒼旻問之著策兮立茲墳乃言千載  
兮衣冠來臻黃頭兮勿傷神

館陶郭公姬薛氏墓誌銘

并序

姬人姓薛氏本東明國王金氏之胤也昔金王有愛子

別食於薛因姓焉世與金氏爲姻其高曾皆金玉貴臣  
大人也父永冲有唐高宗時與金仁問歸國帝疇厥庸  
拜左武將軍姬人幼有玉色發於穠華若彩雲朝升微  
月宵映也故家人美之少號仙子閨嬴臺有孔雀鳳凰  
之事瑤情悅之年十五大將薨遂前髮出家學金仙  
之道而見寶手菩薩靜心六年青蓮不至乃誣曰  
化雲心兮思淑真洞寂滅兮不見人瑤草芳兮思益蓋  
將奈何兮分青春遂返初服而歸我公郭公豪蕩而好  
奇者也雜珮以迎之寶瑟以友之其相得如青鳥翡翠  
之婉孌矣華繁艷歌樂極悲來以長壽二年太歲癸巳  
二月十七日遇暴疾而卒於通泉縣之官舍嗚呼哀哉



郭公恍然猶若未亡也寶珠以含之錦衾而舉之故國  
途遙言歸未迨留殯於縣之惠普寺之南園不忘真也

銘曰

高丘之白雲兮願一見之何期哀淑人之永逝感紺園  
之春時願作青鳥長比翼魂魄歸來遊故國

唐陳州宛丘縣令高府君夫人河南宇文氏墓誌

銘

夫人諱某河南郡人也昔吾君夏后氏之子霸有幽都  
皇運北興鼎國南起開寶符而帝天下撫璿璣而王中  
國則後周之受命武帝之雲孫夫人四代祖也曾禮某  
失周之子封于山陽之國雖存天子之胤已頻咸陽布

衣植德早夭祖某隋朝官澧州澧陽令父某龍州司法  
皆矛家席寵世有令名夫人賁穠華襲繁祉崇徽惠穆  
秀色若榮自于幼年有令儀也十四適于高府君夫其  
溫慈惠和信肅修穆行有法度動有禮經嚴恪以理家  
人嫺瑟以和君子則已含乎光大矣若乃宗廟哀敬仁  
孝也姊姒祗和謙順也蠲潔酒食婦儀也黼黻玄黃女  
工也弘此四德而務六親鞶帔以文之雜佩以發之猗  
可以作範毋儀昭宣壺則矣至於訓子以睦教女以順  
愛下以慈與人以讓外以贊府君之德內以光中饋之  
教皆曰聞其進不見其退也嗚呼仁而不壽生也永中  
永淳元年五月遇疾終于宛丘縣之官舍年二十七嗚



呼哀哉高府君尋以事罷職山塋未卜旌旄來歸府君思北海之魂留東國而殯日月遂往九歲于茲府君方崇樹先塋增封舊域以周天授二年太歲辛卯二月癸卯啓殯於東園祔於洛州某原禮也哀哉夫人雅有高行終而不忘以爲厚塋非禮也是以珠玉不飾塋瓦是歲高府君聿遵其志率以薄塋於戲非古之明德淑女金玉其光何以躋之吾泰門閭之賓其家道矣雍穆懿鑠寔有清風故叙之而未克德也銘曰

天天桃李有華芳灼灼淑人宜家芳修睦婦道不諱芳窈窕嬪儀孔嘉芳榮采之方茂而云亡兮咨嗟

周故內供奉學士懷州河內縣尉陳君碩人墓誌

銘并序

君諱該字彥表綿州顯武人也其先自潁川遷蜀夫曾祖寄祖曾考永貴皆養高不仕君少好學能屬文上元元年州貢進士對策高第釋褐授將仕郎其明年制勅天下文儒司屬少卿楊守訥薦君應詞彈文律對策高第勅授茂州石泉縣主簿開耀元年制舉太子舍人司議郎大府少卿元知讓應制薦君於朝堂對策高第勅授隆州蒼溪縣主簿垂拱四年又應制學綜古今對策高第勅授懷州河內縣尉凡歷所職皆以清廉仁愛著聞有周革命天授三年恩勅自河內追入關供奉居未暮不幸遇疾於神都積善坊攷終厥命年六十三歸葬



於豆四山之陽原禮也嗚呼哀哉古人有云飾顏夷之行不逢青雲之士而聲名磨滅者有之矣嗚呼陳君敦懿玄默潔清溫良馴道執志好學博古狗狗馬行高職卑不改其操學優祿薄不怨於天四舉有道三歷下位晏如也非淳人淑士其誰能涅而不渝哉夫知命可謂君子矣好學可謂爲文矣丹書不藏於勛府青史不昭於方冊於戲一絕故老之口孰知夫子之賢哉某與君族人也服美其德尚矣昔子雲稱李元常璩叙令伯皆沒而不朽後代稱之斯非若人之徒歟吾豈默而無述其銘曰

閭閻君子好斯文兮緝藻肇章潛卿雲兮棲遲下位允升聞兮金署玉堂見吾君兮鸞階鴻漸期紫氛兮鍾鳴漏盡竟蘭林兮儒行墨節將何二兮恭承遺言立石文兮金刻丹書記歲辰兮青龍甲午銘茲墳兮

燕然軍人畫像銘

并序

龍集丙戌有唐制匈奴五十六載蓋畧其君長以郡縣畜人荒服賴寧古所莫記是歲也金徽州都督僕固始桀驚惑亂其人天子命左豹韜衛將軍劉敬同發河西騎士自居延海入以討之特勅左補闕喬知之攝侍御史護其軍夏五月師舍於同城方絕大漠以臨瀚海君子曰兵者凶器仁何至之醜虜猖狂厥自招咎今至尊不得已而順代嘗聞西方之聖有能仁者凶吉之業各



報以直則使元惡授首群阼不孤兵無血刃荒戎底定  
豈不在於大雄乎諸將部校僉曰允武將軍乃飾躬率  
士卒自古祠廟圖畫形容有古之彌勒像也天人備容  
丹青畢彩蓋以昭乎景福也乃作銘曰  
耀天兵兮征荒服絕雲漠兮出玄極白羽飾兮青雲旗  
簫鼓鳴兮士馬悲願左右兮浮屠道備丹青兮妙天寶  
功既畢兮業既成神不來兮福宜宜

○宜實窅窅君古墳記銘

為張昌寧作

神功元年龍集丁酉我有周金革道息寶鼎功成朝廷  
大寧天下無事皇帝受紫陽之道延訪玉京羣臣從白  
雲之遊載馳瑤水笙歌入至玄鶴飛來時余以銀青光

祿大夫忝在中侍擁青旄之節陪翠鸞之旌昔奉車子  
侯獨隨武帝昌明為御每侍軒遊比之今日未足多


幸是時屢從嚴祀遙謁秘封嘗觀衆靈如雲群仙蔽日  
乃仰感王子晉俯接浮丘公行吹洞簫坐弄雲鳳竊欲  
邀羽袂導鸞輿求不死於金庭保長生於玉冊上以尊  
聖壽下以息微躬因登緱山望少室尋古靈跡擬刻真  
容得王子晉之遺墟在永水之層曲且欲開石室管壽  
宮庀徒方輿畚鍤攸作乃得古藏焉其藏上無封壝內  
有甃瓦南北長二丈二尺東西濶八尺中有古劍一長  
尺餘銅椀一并瓦器二其器文彩惟異非蟲篆雕斲所  
能擬也又有古五銖錢朱漆片數十枚初開時文彩可



見及棖撥之應手灰滅既無年代銘誌不知爵里官族  
參驗其事已曾爲人所開於是撫之永懷念昔增密始  
知有形必弊涉噐則毀鍾鼎玉帛非度世之資名位寵  
章爲累真之府未能獨立物表超世長存與日月齊光  
天地比壽非夫道乎宜冥窅冥君久幽琬藏迨此昭發  
豈不欲感示玄契竒暢靈期昔王喬古墳唯留一劍令  
威荒塚又歎千年起予道心在乎此仰惟聖主仁慈恩  
被草木陽和掩骼旣昭國典至德埋齒又在周令今此  
藏虧露誠感仁惻謹曆吉日協良辰卽以其年十月甲  
子朔具物備容還定舊壙脈雞在奠犧罇若歌哀其銘  
誌磨滅姓位不顯乃錫之名曰宜冥君其銘曰 缺

陳子昂文集卷之六





卷一

一



